

KEPADA ANGGOTA-ANGGOTA IKHWAN

Saudara-saudara anggota Ikhwan!

Pada satu Disember, 1956 yang lalu Kiyai Nasir al-Din Latif yang selalu kita dengar suaranya dari radio Jakarta pada tiap-tiap hari Selasa malam Rabu pukul 9.00 malam, dalam perjalannya pulang ke Indonesia dari Moscow telah singgah di Singapura kerana memberi syarahan-syarahan yang dianjurkan oleh “Ikhwan”.

Syarahan beliau yang pertama di rumah Jami’ah (Majlis Wanita-wanita) dan yang kedua di Masjid Sultan. Syarahan beliau itu telah mendapat sambutan yang baik dari peminat-peminatnya, dan oleh kerana saudara-saudara anggota Ikhwan banyak bertebaran dan supaya kita bersama-sama mendapatnya kami mencadangkan supaya diambil ringkasan daripada ucapan beliau itu untuk dimasukkan di dalam ruangan ini supaya dapat kita manfaatnya. Sungguhpun pimpinan Ikhwan bercadang menjadikan syarahan-syarahan itu satu risalah, tetapi ada moleknya terlebih dahulu dapat dihidangkan *khilāṣah* atau ringkasannya yang mustahak diperhatikan oleh anggota-anggota Ikhwan khususnya dan membaca Qalam umumnya.

Di antara lain-lain sesudah membuat mukadimah syarahannya tentang pandangannya dalam masa melawat Soviet Rusia Kiyai Nasir al-Din Latif di antara lain berkata: “Telah tiga puluh tahun umat Islam berbicara dalam suatu pengabdian yang tertentu membaca *wajhātu* tetapi selama itu mereka tidak tahu apa erti *wajhātu* itu. Sembahyang itu suatu pengabdian rohani yang disusun oleh Tuhan dalam bentuk ibadat yang terdiri daripada beberapa

perkara dan perbuatan. Menurut fiqah ialah ibadat yang *makhṣūs* yang dimulai dengan takbir dan diakhiri dengan salam dengan menurut syarat-syarat yang tertentu. Menurut waktunya dan menurut masanya. Kalau betul waktunya dan salah caranya maka tidak diterima sembahyang itu dan demikian juga kalau betul waktunya dan salah caranya.

“Dalam tiap-tiap rakaat sembahyang itu umat Islam membaca Allahuakbar, Allahuakbar kadang *Samia’Allahu liman hamidah* tatkala bangkit daripada rukuk dan yang demikian maka umat Islam telah terdidik dalam sehari semalam membaca sebanyak 85 takbir. Dengan ini zahir kita membesarkan Allah, Allahuakbar, dan sesudah itu maka diakhiri dengan mengucapkan Assalamualaikum, yang dengan cara kita selamat saudara-saudara dan kalau tidak ada orang pun, umpamanya kita sembahyang sendiri mesti ada makhluk Tuhan disamping kita. Sekarang terang dan jelas bahawa Islam mengajar membesarkan Tuhan dan hidup berbaik pada sesama manusia. Ini ada lebih baik daripada seseorang yang mengucapkan “Good Morning”, dan seterusnya. Bahawa Islam mengajar kita membesarkan Tuhan dan menyuruh kita hidup berbaik sesama manusia. Saya katakan dengan sesama manusia tidaklah bermakna kalau bukan Islam ia boleh kita tipu- kalau berhutang dengan orang Cina di kedai tidak usah dibayar sebab ia orang yang akan masuk neraka. Islam tidak mengajar begitu. sebab dari sejak zaman Nabi Ibrahim sudah dikatakan Tuhan:



"Tugas yang maha besar bagi pemuda-pemuda yang mengaku dirinya Islam sekarang ialah mengembalikan kecemerlangan sinar Islam seperti dulu kala, oleh kelalaian dan ketidurannya demikian saudara Rusdi Kasim dalam pidatonya di rumah Jami'ah pada 30 Disember yang lalu yang dianjurkan oleh Ihkwan.

"*Yā khalīlī hasan halāqka walau ma'a al-kafār*": Berbaik-baiklah akhlakmu, tingkah lakumu walaupun terhadap orang yang bukan Islam.

Maksudnya sebab telah tetap keputusan Aku, kata Tuhan, bahawa siapa yang mengabaikan budi pekertinya ia akan Aku tempatkan dalam syurgaKu.

"Saya telah pernah bertanya tatkala saya di Baghdad.

Saya bertanya: Drebar ini orang apa? Ini orang Kristian, kata mereka. Ini orang Kristian, itu orang Kristian. Dan saya hairan mengapa di negeri Islam orang Kristian mendapat tempat yang begitu. Jawapan yang diberi, kata mereka, memang di sini orang yang beragama Kristian lebih boleh dipercayai dan kalau orang Islam selalu mengecoh orang yang bukan

Islam, tidak mahu membayar hutang di kedai.

Hal ini kan salah sekali dan dengan perbuatan itu nama Islam terbawa-bawa pada hal Islam tidak mengajar budi pekerti yang demikian kerana Islam mengajar pengikut-pengikutnya memperbaiki budi pekerti mereka.

"Saudara-saudara kaum Muslimin, di dalam kehidupan dunia ada satu pendirian yang harus kita pegang iaitu ajaran agama kita membesarakan Allah yang telah dilatihnya kita membaca Allahuakbar 85 kali sehari semalam, Allahuakbar hingga kita hafal. Ertinya Allah yang Maha Besar. Kepada yang satu ini sahaja kita mengabdikan diri dan kapadanya sahaja kita menyandarkan jiwa kita.

Wa a'lā Allāh sālyatāwakkal al-mu'minūn. Maksudnya: Hanya kepada Allah jua orang-orang Muslimin bersandar.

"Saudara, kalau saya berkenalan dan bersahabat dengan seorang inspektor polis sudah tentu keberanian saya agak lain sedikit. Kalau saya ditangkap di jalan maka dengan segera saya akan berhubung atau menelefon sahabat saya itu. Jadi dengannya keberanian saya ada lebih sedikit dan apa lagi kalau saya berkenalan dengan tuan Gabenor tentulah lebih lagi keberanian saya sebab saya yakin ia akan menolong saya.

"Ini menunjukkan bahawa keberanian itu adalah bergantung kepada tempat persandaran yang boleh menolong mereka. Juga seseorang kalau pergi ke tempat-tempat yang suci dan kalau ada senjata api di tangannya tentu ia lebih berani, tetapi kalau tidak ada senjata itu tentulah ia akan berasa takut dan gentar.

"Mereka berasa aman kalau ada tempat bersendirian mereka. Itu memang sebenarnya. Tetapi Islam mengajar supaya kita jangan menyandarkan kepada itu - kepada manusia, kepada senjata api, kerana semuanya itu makhluk. Sandarkanlah jiwa kita kepada yang tidak boleh mati, kepada yang Maha Berkusa, yang lebih berkusa di dalam alam ini. Siapa? Iaitu Tuhan kita yang Maha Suci. Tuhan tidak mati,

Tuhan tidak berhenti-henti jadi Tuhan, Tuhan tidak takut pada segala orang yang ditakuti manusia. Betapa hebatnya jika jiwa umat Islam bersandaran hanya kepada Tuhan. Keberaniannya bukan main-main.

Tuhan tidak boleh mati dan kita tidak akan mati kalau tidak diizinkan Tuhan. begitu jiwa umat Islam. Ini tidak boleh digoncang-goncang sebab kepada Tuhan ia bersandar. Ia memulangkan segala-galanya hanya kepada Tuhan. Kalau hidup kata Tuhan mesti kita hidup, kalau mati kata Tuhan tentu mati.

“Jadi jiwa seseorang manusia yang mempunyai kepercayaan yang begini tidak boleh dipatahkan oleh tenaga alam dan inilah yang mengangkat umat Islam dahulu pada kurun yang pertama dan kurun yang kedua- nanti mereka tidak takut- inikan hebat ! ! ! Miskin ia tidak takut kerana masih ada tuhan. Kalau bersandar dengan tuan Gabenor kita sudah merasa gagah, apalagi ini sebab Tuhan tidak ada perbandingannya.

“Sebab itu saban hari kita baca 17 kali

Alhamdulillahi Rabbi al-‘ālamīn segala puji pulang kepada Allah Tuhan sekalian alam. Kalau kita menghargai seseorang kerana besarnya maka ini *Rabbi al-‘ālamīn* Tuhan sekalian alam- Hebat Raja dari sekalian Raja. Kalau kita menyandarkan kerana bersahabat seseorang yang barangkali kerana wangnya banyak-maka ini *al-Rahman al-Rahīm-* maha pengasih maha penyayang. Kerana takut akan kekuasaannya- ia yang sangat berkuasa yang menguasai hari pembalasan. Walau bagaimana besarnya kita menyandarkan hati dan jiwa kita kepada makhluk - ini *Rabbi al-‘ālamīn*.

“Kalau mengharapkan keuntungan sebab manusia yang melunakkan gigi dari lidahnya kerana ada yang

diharapkannya-boleh juga, tetapi ini Allah yang Maha Pengasih dan Penyayang. Kalau kerana cukup kekuasaannya ini- *Maliki Yaumi al-Dīn-* sebab itulah dalam susunan Surah Alfatihah sudah menyebutkan kekuasaan Tuhan, kejayaanNya, keagunganNya, maka timbul perkataan kita, sesudah menyebutkan *al-Rahman al-Rahīm Maliki Yaumi al-Dīn* baru kita sebutkan *wa iyyaka nasta ‘īn -* akan Engkau sahaja Ya TuhanKu, hanya kepada Engkau kami menyembah dan hanya kepada Engkau sahaja tempat kami meminta. Saban hari kita kerjakan ini, *Ihdinā al-ṣirāṭa al-mustaqīm-* tunjuki kami Ya Allah jalan yang lurus, jalan yang lurus ialah jalan yang paling dekat-ertinya jalan yang paling hampir kepada Tuhan.

“ Kalau kita sembahyang memakai imam, imam membaca dahulu kita dibelakang dan sesudah selesai kita mengatakan Amin- perkenanlah- bersetuju dengan apa yang dibaca oleh imam itu- tidakkah begitu kalau diertikan secara luarnya.

“Dengan ini sesudah kita berkata-kata dengan Tuhan sebagai disabdakan oleh *Ina Lam TariAllah fānahū yarāka* maksudnya: Kalau kamu tidak melihat Tuhan, Tuhan melihat engkau.

“Kalau berbalik dari mulanya sesudah kita membersihkan diri kita, rapi-rapikan sekaliannya, maka sesudah kita menghadapkan diri ke kiblat maka kita membaca Allahuakbar-Tuhan Maha Besar. Setelah itu kita membaca *Wajjahtu wajhiya li alladhina fāṭara al-samāwati wa al-ard hanīfān musliman wa mā anā mina al-mushrikīn-* maksudnya: saya hadapkan wajah saya kepada Tuhan yang menjadikan langit dan bumi, sangat sayang, cenderung kepada Islam dan saya salah seorang Muslimin dan saya bukan musyrik. Gagah sungguh perkataan kita itu- penting

ertinya saya hadapkan wajah saya pada Tuhan yang menjadikan langit dan bumi, sangat sayang, kepada Islam saya cenderung dan saya seorang Islam dan bukan orang musyrik. “*Inna ṣolātī wanusukūt wamahyāya wa mamātī Lillahi rabbi al-‘ālamīn*” sesungguhnya sembahyang saya, ibadah saya, hidup dan mati saya pada Allah Tuhan sekalian alam. “*Lā sharikalahu wabidhalika umirtu wa anā mina al-Muslimīn*” maksudnya: Tiada sekutu bagi-Nya dan dengan inilah aku diperintahkan dan aku daripada orang Islam.

Tadi telah saya katakan orang Islam tidak

Komunis dan Komunis tidak Islam ada tetapi yang turut-turutan itu lain. Sebab itu mereka persembahannya atau keyakinannya tidak mungkin bertemu dengan



“*Kalau haram kata manusia dan halal kata Tuhan, maka bagi orang Islam wajib melaksanakan apa kata Tuhan itu walau di lautan api sekalipun*” - demikian saudara riwayat hadis dari al-Qatani dalam pidatonya di rumah Jami’ah atas anjuran “Ikhwan”.

pengertian tidak ber-Tuhan. Kemudian kita tunduk (rukuk) lalu membaca *subḥā rabbiya al-‘azīm*. Maha Suci Tuhanku Yang Maha Besar. Kenapa kita rukuk- tidak bertengadah-tadi sudah saya mengatakan bahawa hidup saya dan mati saya buat Tuhan- lihat caranya -ertinya leher saya terserah buat Tuhan_mati kata Tuhan mati. Kan begitu! Kemudian kita bangun lagi lalu membaca *Rabbanā laka al-hamdu*-Ya Tuhan kami bagi Engkaulah pujian sepenuh langit dan sepenuh bumi.

Sesudah itu kita sujud. Ini ialah sesuatu perkara yang mustahak sebab kita tidak boleh mencacahkan dahi kita selain kepada Tuhan. Manusia tidak boleh sujud kepada sesama manusia. Kita baca *subḥāna rabbiya al-a’lā*-Maha Suci Tuhanku yang Maha Tinggi. Kemudian kita duduk lalu menyusun sepuluh jari dan membaca *rabbighfirlī*-Ya Tuhanku ampunilah aku. Kita tentu mempunyai kesalahan sedangkan Nabi 70 kali sehari meminta ampun. Sebab itulah di dalam kita menyusun jari kita membaca *rabbighfirlī warḥamnī*-ampunilah saya, *Wajibrini* – perbaikilah kekurangan-kekurangan saya, *Warfa’ni* tinggikan saya, *Warizqni* berilah saya rezeki, *Wahdinī*- tunjuki saya jalan yang lurus, *Wa ‘āfinī*- belalah saya, selamat walafiatkanlah saya, *wā’ifū ‘annī* - maafkanlah kesalahan-kesalahan saya. Sesudah itu kita sujud sekali lagi. Begitulah saudara-saudara kalau kita umat Islam betul-betul bersembahyang kepada Tuhan. Dalam latihan ibadat yang semacam ini 5 kali sehari semalam kita lakukan, bukan main-main jiwa yang semacam ini wajar, tidak takut kepada sesiapa pun- begitulah semestinya percayanya bulat kepada Tuhan. Selama Tuhan masih ada ia tidak akan melupakan saya. Kerana itu sudah tentulah yang demikian menetapkan keyakinan

dan kepercayaan.”

Saudara-saudara anggota Ikhwan inilah sebahagian daripada ucapan Kiyai Nasir al-Din Latif yang telah diucapkannya di dalam suatu syarahan di Masjid Sultan yang dianjurkan oleh Ikhwan. Iktibarkanlah, wahai saudara-saudara anggota Ikhwan, bagaimana mestinya kita sembahyang, bagaimana mestinya kita menunaikan kewajipan kita sebagai umat Islam tatkala mengadap Tuhan. Pelajarilah makna kata-kata sembahyang itu untuk menguatkan atau menambahkan hati saudara-saudara tatkala menghadap Tuhan, tatkala sujud di hadapan Tuhan, dengan mengerti akan kata-kata itu maka saudara-saudara akan khusyuk menghadap Tuhan yang mengetahuilah bahawa seseorang hamba Tuhan tidak ada mempunyai sesuatu kekuasaan dan kekuatan. Saudara tidak akan dapat membangkitkan kepala, tidak akan berani membangkitkan Tuhan, tetapi kepada yang lainnya kerana saudara-saudara mempunyai keyakinan kepada Tuhanlah saudara dan sudah tetap saudara sebagai seorang Islam sebagai seorang mukmin yang sujud di hadapan Tuhan akan taat dan menyempurnakan janji saudara hidup di dunia ini bahawa akan memberi pengorbanan untuk menegakkan kalimah Tuhan-tidak ada yang lain daripada itu, tidak ada pecahan-pecahan yang lain daripada itu dan yang saudara harap tidak lain dan tidak bukan ialah keredhaan-Nya. Keredhaan-Nya tidak akan saudara dapat selagi saudara tidak bersedia bekerja menegakkan dan mendirikan kalimah Tuhan di mana saudara berada. Jagalah tanggungjawab dan jagalah pertanyaan-pertanyaan yang akan dihadapkan oleh Tuhan kepada saudara apabila saudara tidak bersedia memberi pengorbanan kerana menegakkan kalimah Tuhan itu.

KENYATAAN KEPADA ANGGOTA-ANGGOTA IKHWAN

Pimpinan Ikhwan dari satu ke satunya berharap mendapat kerjasama dari anggota-anggota Ikhwan. Ikhwan selalu mengadakan ceramah-ceramahnya di Singapura dan untuk memberi peluang kepada saudara-saudara yang di luar Singapura maka kami mengusahakan supaya ceramah-ceramah itu dibukukan.

Ceramah yang pertama yang diucapkan oleh Prof Abdul Kahar Muzakkir telah kami siarkan.

Yang kedua-risalah “Kesedaran” telah kami siarkan tetapi kurang mendapat perhatian.

Yang ketiga ucapan Kiyai Muhammad Arshad Talib Lubis sedang kami usahakan, juga ucapan Kiyai Nasaruddin Latif tentang “rumahtangga” sedang kami usahakan untuk dibukukan.

Bagi satu-satu risalah itu kami tidak meminta bayaran harganya kepada anggota-anggota Ikhwan tetapi kami meminta tiap-tiap seorang menghantarkan setem 10 sen untuk belanja mengirimnya-lainnya tidak.

Tujuannya ialah supaya tiap-tiap anggota Ikhwan mendapat faedah dan manfaatnya dengan tidak berbelanja-selain daripada setem. Pintalah kepada:

IKHWAN,
358-B. Geylang Rd..
Singapore 14.